

Wadah



JANUARI - MAC 2019 | RABIULAKHIR - JAMADILAKHIR 1440

BILANGAN 66 | JILID 22



Pengurniaan Mesin Braille kepada
Para Pelajar Sensori Penglihatan

Dasar Penubuhan

Yayasan Sultan Haji Hassanal Bolkiah

Menjadi Wadah Amal Jariah Kebawah Duli Yang Maha Mulia
Paduka Seri Baginda Sultan Haji Hassanal Bolkiah Mu'izzaddin Waddaulah
dan Ahli Keluarga Baginda.

Sebagai tanda pemedulian dan kasih Kebawah Duli Yang Maha Mulia
Paduka Seri Baginda Sultan Haji Hassanal Bolkiah Mu'izzaddin Waddaulah
kepada rakyat Baginda yang sentiasa taat setia kepada Baginda
dan Kerajaan Baginda.

Menjadi lambang pembentukan dan perpaduan masyarakat dan Negara Brunei Darussalam
yang sejahtera dan makmur serta keharmonian umat manusia antarabangsa mengikut
keadaan dan kesesuaian yang diredhai oleh
Allah Subhanahu wa Ta'ala.






Hasrat Titah

“ Beta ingin mengajak semua lapisan rakyat dan penduduk untuk sama-sama mendokong konsep berkorban dalam semua bidang duniaawi dan ukhrawi. Kita berkorban untuk negara adalah dengan harta, masa dan titik peluh atau tenaga, sementara kita berkorban untuk akhirat pula ialah dengan keta'atan dalam bentuk ibadat kepada Allah. ”

**Petikan Titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah Ibni Al-Marhum Sultan Haji Omar 'Ali Saifuddien Sa'adul Khairi Waddien,
Sultan dan Yang Di-Pertuan Negara Brunei Darussalam
Sempena Hari Raya 'Idil Adha
Tahun 1439H / 2018M**



Kandungan

Editorial

- 2 Menjayakan Wawasan Negara

Berita Perdana

- 4 Pengurniaan Mesin Braille kepada Para Pelajar Sensori Penglihatan



Berita Utama

- 8 Doa Kesukuran Sempena Puja Usia Duli Yang Teramat Mulia Paduka Seri Pengiran Muda Mahkota

- 9 Mesyuarat Jemaah Tadbir Kali Ke-2/2018

Ihsan

- 10 Program Kemahiran Keibubapaan bagi Pelajar Keperluan Khas



- 11 Bengkel Pengenalan Perusahaan Sosial

- 13 Tingkatkan Keupayaan Penerima Bantuan Keusahawan

- 14 Bengkel Ivy League bagi Sultan's Scholar

- 15 Perkhemahan Belia Tingkatkan Kemahiran Kepimpinan



Berita

- 17 Sambutan Maulidur Rasul

- 18 Warga Kerja Yayasan Sertai Sambutan Hari Kebangsaan Ke-35

- 20 Mesyuarat Penyelarasan Pembahagian Buah Kurma Kurnia Peribadi KDYMM

- 21 Promosi Biasiswa Sultan's Scholar dalam Ekspo Pengajian Tinggi



Sumbangan Amal

- 22 Sumbangan Peralatan dan Keperluan Sekolah

- 23 Sumbangan Yayasan Ringankan Beban Mangsa Kebakaran

Lawatan

- 24** Kunjungan daripada Pengerusi Eksekutif Yayasan RESTU, Malaysia
- 26** Lawatan Peserta Kursus Akademi Pertahanan ABDB
- 26** Lawatan Pelajar Namseoul University, Korea Selatan
- 27** Lawatan Peserta Misi Sukarelawan Antarabangsa

Berita Kaligrafi

- 28** Peraduan Menulis Seni Khat dan Mewarna

Kegiatan Sukarelawan

- 29** Program Induksi Sukarelawan
- 29** Ekspo Khidmat Masyarakat UNISSA
- 30** Aktiviti Kemasyarakatan Membersihkan Masjid

Aktiviti DANA

- 31** Pelancaran SMS Brunei Prihatin bagi DANA
- 32** Penyampaian Bantuan Persekolahan bagi Anak Yatim

Kegiatan Sekolah

- 33** Penyampaian Hadiah Kecemerlangan Akademik bagi Peperiksaan BC-GCE Peringkat 'O'
- 34** Program Pertukaran Pelajar - River Valley High School
- 35** Persidangan Isu-isu Global Borneo Kali Ke-15
- 36** Program Orientasi Pelajar Tahun 7
- 36** Sambutan Hari Hindi Sedunia 2019
- 37** Kem Kitani Kali Ke-4
- 37** Sukan Tahunan 2019
- 38** Majlis Konvokesyen dan Penyampaian Hadiah Terbaik Tahun 6

- 39** Pelajar Cemerlang Tahun 1-5 Diraiakan

- 40** Sambutan Ulang Tahun Hari Kebangsaan Ke-35

- 41** Program Kesedaran Keselamatan Jalan Raya

- 41** Taklimat Mengenai 'Puberty and Hygiene'

- 42** Program Outreach OGDC

- 43** Pelancaran Bulan 'Science and Art'

- 44** Penyampaian Sijil Akademik dan Konsert Taman Asuhan Kanak-Kanak

- 45** Meraikan Ulang Tahun Hari Kebangsaan Ke-35

- 45** Hari Orientasi Taman Asuhan 1

- 46** Lawatan TASKA ke Galeria Kesihatan

- 47** Muzakarah Guru bersama Ibu Bapa dan Penjaga



Atur Huruf, Reka Bentuk dan Pencetak
Brunei Press Commercial Printing Services

Penerbit

Yayasan Sultan Haji Hassanal Bolkiah
Negara Brunei Darussalam

Pengerusi Lembaga Pengarah

Yang Berhormat Pehin Datu Lailaraja Mejah
Jeneral (B) Dato Paduka Seri Haji Awang
Halbi bin Haji Mohd. Yussof

Pengarah Urusan

Dato Paduka Eddie bin
Dato Paduka Haji Sunny

Penolong Pengarah Urusan

Awang Haji Musthapa bin Haji Matahir
Awang Haji Puasa bin Haji Jumat
Dayang Hajah Donnaliza binti
Abdullah Puasa

Ketua Editor

Dayangku Azami binti Pengiran Haji Ahmad

Editor

Awang Kasyfil Aziz bin Haji Jumat
Pengiran Shah Rizal bin Pengiran
Haji Mohd. Said
Pengiran Siti Norkarimah binti Pengiran
Anak Haji Hashim

Menjayakan Wawasan Negara

Dalam sama-sama mendukung Wawasan Brunei 2035 yang bakal menjelang dalam satu setengah dekad akan datang, Yayasan Sultan Haji Hassanal Bolkiah (Yayasan) telah mengatur dan menjalankan pelbagai usaha termasuk meneroka bidang keusahawanan, sukarelawan dan sosioekonomi yang menjadi pemangkin kepada pembangunan kapasiti para belia di negara ini.

Alhamdulillah, lebih 35 tahun Negara Brunei Darussalam mencapai status sebagai sebuah negara yang berdaulat lagi merdeka. Keamanan dan kesejahteraan berbangsa, beragama dan bernegara yang dinikmati oleh rakyat dan penduduk Negara Brunei Darussalam telah menjadikan negara tercinta ini dikenali dan dihormati oleh arena antarabangsa.

'Menjayakan Wawasan Negara' terus kekal menjadi tema Sambutan Ulang Tahun Hari Kebangsaan Ke-35 pada tahun 2019. Tema tersebut memberi makna yang sangat besar dan memerlukan segenap lapisan masyarakat dan penduduk negara ini mengambil peranan dan menjadikan diri masing-masing sebagai aset berguna dalam pembangunan negara ke arah mencapai aspirasi berkenaan.

Bagi merealisasikan Wawasan ini, seluruh rakyat dan penduduk perlu melengkapkan diri dengan ilmu dan kemahiran, bersiap siaga dalam membangun negara, serta meningkatkan daya saing, berinovatif, kreatif, membangun ekonomi, politik, sosiobudaya, keselamatan dan sebagainya.

Dalam proses membangun negara, adalah tidak dapat disangkalkan akan pentingnya peranan yang dimainkan belia. Belia merupakan aset bernilai yang perlu diasuh dan diberi perhatian. Dalam beberapa dekad kebelakangan ini, para belia telah meningkat jumlahnya dan lebih berkaliber, saling berhubung antara mereka dengan kekerapan jauh lebih

signifikan dari sebelumnya dan telah pun menyumbang kepada ketahanan komuniti, mencipta penyelesaian yang inovatif, memacu kemajuan sosial dan merangsang perubahan. Belia negara membuktikan kehadiran mereka sebagai agen perubahan, menggerakmajukan aspirasi negara, meningkatkan peluang memperbaiki kehidupan dan mengisi ruang dalam penyediaan sekuriti sosial.

Dalam sama-sama mendukung Wawasan Brunei 2035 yang bakal menjelang dalam satu setengah dekad akan datang, Yayasan Sultan Haji Hassanal Bolkiah (Yayasan) telah mengatur dan menjalankan pelbagai usaha termasuk meneroka bidang keusahawanan, sukarelawan dan sosioekonomi yang menjadi pemangkin kepada pembangunan kapasiti para belia di negara ini. Selain itu, Yayasan juga memainkan peranan yang signifikan dalam menyokong dan mendukung Wawasan Brunei 2035 di samping menjadi salah satu jentera penggerak mengikut arah tuju yang dihasratkan.

Sempena sambutan ulang tahun Hari Kebangsaan Negara Brunei Darussalam ke-35, marilah kita bersama-sama bersatu padu dan berganding bahu meningkatkan semangat perpaduan menanai kedaulatan raja, ugama Islam, bangsa dan negara yang tercinta. ●

Dayangku Azami binti Pengiran Haji Ahmad
Ketua Editor

Realising The National Vision

In the remaining one and half decade of 2035 vision, Yayasan Sultan Haji Hassanal Bolkiah (Yayasan) continues to plan, support and implement programs which include venturing into areas of entrepreneurship, volunteerism and socioeconomic arena.

Alhamdulillah, for over 35 years, Brunei Darussalam, a sovereign and independent Sultanate has been blessed with peace and tranquility. The economic prosperity, stability and harmony which the nation enjoyed has accorded the Sultanate international respects.

'Menjayakan Wawasan Negara' or Realising The Nation's Vision remained the 35th Brunei Darussalam National Day 2019's theme. The theme bears great significant and meaningful implications as it demands a far more cohesive community engagement. Every member of the community is a valuable asset to the nation in achieving the nation's aspiration.

In attaining the vision of 2035, each member of the community has the responsibility in equipping self with the necessary skills and knowledge in readiness to contribute to the nation's development; to enhance creativity, innovativeness and competitiveness so as to establish, develop and sustain economic, sociocultural development and security.

Youth's role in a country's development is undeniably significant and they are the country's most valuable asset that requires nurturing and attentions. In the last few decades, the nation's youth has grown in numbers and calibre, connecting to each other like never before and already contributing to the resilience of the communities, proposing innovative solutions, driving social

progress and inspiring change. The nation's youth are proving themselves as agents of change, mobilizing to advance the nation's aspiration, improving lives chance of people and filling gaps in the provision of social security.

In the remaining one and half decade of 2035 vision, Yayasan Sultan Haji Hassanal Bolkiah (Yayasan) continues to plan, support and implement programmes which include venturing into areas of entrepreneurship, volunteerism and socioeconomic arena. These are catalyst for youth capacity building in the country. Apart from that, Yayasan plays significant roles in supporting the country's vision 2035 and remains as one of the driving force moving in the desired pathways and directions.

In conjunction with the Brunei Darussalam's 35th National Day celebration, let us unite and work together, enhance unity, uphold sovereignty, love for nation and religion. ●

Dayangku Azami binti Pengiran Haji Ahmad
Editor-in-Chief

Pengurniaan Mesin Braille kepada Para Pelajar Sensori Penglihatan



Duli Yang Teramat Mulia Paduka Seri Pengiran Muda 'Abdul Malik ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Pengurus Jemaah Tadbir Yayasan Sultan Haji Hassanal Bolkiah berkenan berangkat bagi menyempurnakan Majlis Pengurniaan Mesin Braille Sumbangan Yayasan Sultan Haji Hassanal Bolkiah pada 27 Jamadilakhir 1440 bersamaan 4 Mac 2019 di Dewan Serambi Suluh,

Pusat Latihan Kesenian dan Pertukangan Tangan, Subok, Bandar Seri Begawan.

Pemberian sumbangan mesin braille ini adalah merupakan salah satu inisiatif Yayasan Sultan Haji Hassanal Bolkiah dalam menangani kebajikan dan kesejahteraan golongan orang-orang kelainan upaya iaitu para pelajar sensori penglihatan bagi mempertingkatkan keupayaan dan potensi mereka dalam pelajaran. Mesin braille ini adalah

bagi kegunaan peribadi pelajar sensori penglihatan supaya mereka dapat sama-sama menikmati peluang untuk maju dan mengecap peluang pendidikan yang sama rata seperti pelajar-pelajar yang lain.

Di majlis tersebut, Duli Yang Teramat Mulia Paduka Seri Pengiran Muda 'Abdul Malik, Pengurus Jemaah Tadbir Yayasan Sultan Haji Hassanal Bolkiah berkenan menyempurnakan

pengurniaan mesin braille iaitu Perkins Brailler kepada seramai 42 orang pelajar sensori penglihatan. Mereka adalah terdiri daripada 20 orang pelajar sensori penglihatan dari sekolah rendah dan sekolah menengah, Jabatan Sekolah-Sekolah, Kementerian Pendidikan dan 22 orang pelajar sensori penglihatan dari sekolah-sekolah ugama dan institusi pengajian ugama, Jabatan Pengajian Islam, Kementerian Hal Ehwal Ugama.

Para pelajar tersebut telah dikenal pasti berkebolehan mengenal dan menggunakan kod braille oleh pihak sekolah masing-masing. Mesin braille ini akan dapat digunakan para pelajar dalam pembelajaran mereka dalam bilik kelas mahupun semasa membuat kerja latihan mereka di rumah.

Majlis Penyempurnaan Pengurniaan Mesin Braille Sumbangan Yayasan Sultan Haji Hassanal Bolkiah dimulakan dengan

bacaan ayat-ayat suci Al-Quran oleh Awang Haji Mohd Khairulzaman bin Haji Mohd Saleh, pelajar sensori penglihatan dari Institut Tahfiz Al-Quran Sultan Haji Hassanal Bolkiah.

Seterusnya, sembah alu-aluan disampaikan oleh Yang Berhormat Pehin Datu Lilaraja Mejar Jeneral (B) Dato Paduka Seri Haji Awang Halbi bin Haji Mohd. Yussof, Pengurus Lembaga Pengarah Yayasan Sultan Haji Hassanal





Bolkiah. Yang Berhormat Pehin menyembahkan bahawa keberangkatan Duli Yang Teramat Mulia Paduka Seri Pengiran Muda 'Abdul Malik, Pengerusi Jemaah Tadbir Yayasan Sultan Haji Hassanal Bolkiah ke majlis tersebut mencerminkan keluhuran dan keprihatinan mendalam dan keberterusan Duli Yang Teramat Mulia di atas usaha Yayasan Sultan Haji Hassanal Bolkiah dalam memeduli kebajikan dan kesejahteraan golongan orang-orang kelainan upaya di negara ini.

Pada akhir majlis tersebut, Duli Yang Teramat Mulia Paduka Seri Pengiran Muda 'Abdul Malik berkenan menyaksikan pameran bahan dan alat bantu bagi golongan sensori penglihatan serta mengenai inisiatif pihak kerajaan dan badan bukan kerajaan dalam sama-sama meningkatkan kesejahteraan mereka. Pameran tersebut disertai oleh Unit Pendidikan Khas Kementerian Pendidikan, Jabatan Pengajian Islam, Kementerian Hal Ehwal Ugama; Jabatan Pembangunan Masyarakat, Kementerian Kebudayaan, Belia dan Sukan; dan Brunei Darussalam National Association

of Blinds (BDNAB). Duli Yang Teramat Mulia Paduka Seri Pengiran Muda 'Abdul Malik seterusnya berkenan bergambar ramai dan beramah mesra bersama para pelajar yang menerima sumbangan mesin braille.

Turut hadir di majlis tersebut ialah Ahli-ahli Jemaah Tadbir dan Ahli-ahli Lembaga Pengarah Yayasan Sultan Haji Hassanal Bolkiah, pegawai-pegawai kanan Kerajaan dan ahli-ahli badan bukan kerajaan yang terlibat, serta para ibu-bapa dan penjaga penerima. ●





Doa Kesyukuran Sempena Puja Usia Duli Yang Teramat Mulia Paduka Seri Pengiran Muda Mahkota

Duli Yang Teramat Mulia Paduka Seri Pengiran Muda 'Abdul Malik ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Pengurus Jemaah Tadbir Yayasan Sultan Haji Hassanal Bolkiah berkenan berangkat ke Majlis Doa Kesyukuran Sempena Memperingati Hari Ulang Tahun Puja Usia Duli Yang Teramat Mulia Paduka Seri Pengiran Muda Mahkota Pengiran Muda Haji Al-Muhtadee Billah Ke-45 Tahun pada 13 Jamadilakhir 1440 bersamaan 18 Februari 2019 di Dewan Serba Guna, Kompleks Yayasan Sultan Haji Hassanal Bolkiah.

Majlis ini merupakan acara tahunan dalam kalender kegiatan Yayasan Sultan Haji Hassanal Bolkiah selaku Sekretariat Dana Pengiran Muda Mahkota Al-Muhtadee Billah Untuk Anak-Anak Yatim (DANA).

Atur cara majlis dimulakan dengan Sembahyang Fardu Maghrib berjemaah yang diimamkan oleh Yang Dimuliakan Pehin Orang Kaya Paduka Setia Raja Dato Paduka Seri Setia Haji Awang Suhaili bin Haji Mohiddin, Hakim Mahkamah Rayuan Syariah.

Majlis diikuti dengan bacaan surah Yasin dan tahlil beramai-ramai dan diteruskan dengan bacaan Doa Kesyukuran Sempena Hari Ulang Tahun Puja Usia Duli Yang Teramat Mulia Paduka Seri Pengiran Muda Mahkota Pengiran Muda Haji Al-Muhtadee Billah ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah yang ke-45 tahun. Majlis kemudiannya diakhiri dengan Sembahyang Fardu Isyak berjemaah.

Majlis tersebut dihadiri oleh Ahli-ahli Jemaah Tadbir dan Lembaga Pengarah Yayasan Sultan Haji Hassanal Bolkiah, Ahli-ahli Lembaga Pemegang Amanah DANA, para pegawai dan kakitangan Yayasan Sultan Haji Hassanal serta para jemputan khas yang terdiri daripada beberapa penyumbang tetap kepada DANA.

DANA merupakan pesambah yang berkekalan dalam bentuk yayasan amal yang disembah oleh Yayasan Sultan Haji Hassanal Bolkiah sempena memperingati Pemasyuharan Yang Teramat Mulia Paduka Seri Pengiran Muda Haji Al-Muhtadee Billah menjadi Duli Yang Teramat Mulia Paduka Seri Pengiran Muda Mahkota pada 17 Rabiulakhir 1419 bersamaan 10 Ogos 1998. DANA telah ditubuhkan pada 4 Jamadilawal 1429 bersamaan 25 Ogos 1998. ●



Mesyuarat Jemaah Tadbir Kali Ke-2/2018

Duli Yang Teramat Mulia Paduka Seri Pengiran Muda 'Abdul Malik ibni Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Pengerusi Jemaah Tadbir Yayasan Sultan Haji Hassanal Bolkiah telah berkenan berangkat mempengerusikan Mesyuarat Jemaah Tadbir Yayasan Sultan Haji Hassanal Bolkiah Kali Ke-2 bagi tahun 2018. Mesyuarat diadakan pada 22 Muharam 1440 bersamaan 2 Oktober 2018 bertempat di Jabatan Perdana Menteri, Jalan Perdana Menteri, Bandar Seri Begawan.

Mesyuarat dihadiri oleh Yang Amat Mulia Pengiran Indera Setia Diraja Sahibul Karib Pengiran Anak Haji Idris bin Pengiran Maharaja Lela Pengiran Muda Abdul Kahar, Timbalan Pengerusi I Jemaah Tadbir; Yang Berhormat Pehin Datu Seri Maharaja Dato Paduka Seri Setia (Dr.) Ustaz Haji Awang Abdul Aziz bin Juned, Timbalan Pengerusi II Jemaah

Tadbir Yayasan; Yang Berhormat Pehin Orang Kaya Seri Kerna Dato Seri Setia (Dr.) Haji Awang Abu Bakar bin Haji Apong, Ahli Jemaah Tadbir Yayasan dan Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Awang Othman, Ahli Jemaah Tadbir Yayasan.

Turut hadir dalam mesyuarat tersebut ialah Yang Berhormat Pehin Datu Lailaraja Mejari Jeneral (B) Dato Paduka Seri Haji Awang Halbi bin Haji Mohd. Yussof, Pengerusi Lembaga Pengarah Yayasan; Yang Berhormat Dato Seri Setia Dr. Awang Haji Mohd Amin Liew bin Abdullah, Timbalan Pengerusi Lembaga Pengarah Yayasan; Yang Berhormat Dato Seri Setia Awang Haji Suhaimi bin Haji Gafar, Ahli Lembaga Pengarah Yayasan yang juga selaku Pengerusi Wadah Amal Sdn. Bhd.; Datin Seri Paduka Dayang Hajah Elinda binti Haji C.A. Mohamed, Ahli Lembaga Pengarah Yayasan yang

jugalah selaku Timbalan Pengurus Wadah Amal Sdn Bhd; dan Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah.

Antara agenda yang dibincangkan dalam mesyuarat tersebut ialah perancangan bagi menangani isu-isu berkaitan Kompleks Yayasan Sultan Haji Hassanal Bolkiah yang kini dikendalikan oleh anak syarikat Yayasan Sultan Haji Hassanal Bolkiah iaitu Wadah Amal Sdn. Bhd. Selain itu, perlaksanaan kerja-kerja pembinaan di Kampong Bolkiah dan usaha-usaha bagi meningkatkan kegiatan ekonomi dan kebajikan penduduk kampung berkenaan juga menjadi agenda yang dibincangkan.

Jemaah Tadbir Yayasan bertanggungjawab mengawasi pentadbiran Yayasan Sultan Haji Hassanal Bolkiah dan memastikan perjalanan serta perlaksanaan Yayasan menepati dasar dan tujuan penubuhannya. ●



Program Kemahiran Keibubapaan bagi Pelajar Keperluan Khas

Program Kemahiran Keibubapaan adalah merupakan salah satu inisiatif Yayasan Sultan Haji Hassanal Bolkiah melalui Program Intervensi Pendidikan bagi menangani isu berhubung kait dengan kemahiran keibubapaan dalam meningkatkan pencapaian pendidikan anak-anak mereka.

Yayasan dengan kerjasama Unit Pendidikan Khas, Kementerian Pendidikan telah menganjurkan Program Kemahiran Keibubapaan khusus bagi para ibu bapa yang mempunyai anak-anak berkeperluan khas. Program tersebut dijalankan selama dua hari pada 7 dan 8 Safar 1440 bersamaan 16 dan 17

Oktober 2018, di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan.

Program tersebut telah dihadiri seramai 97 orang peserta yang terdiri daripada 29 orang guru-guru *Special Education Needs Assistance* (SENA), 50 orang pasangan ibu bapa atau penjaga yang terlibat dalam program SENA, dan 18 orang pegawai Unit Pendidikan Khas, Kementerian Pendidikan.

Program bertujuan untuk meningkatkan kapasiti ibu bapa atau penjaga agar mereka berpengetahuan dan berkemahiran dalam menangani keperluan khusus bagi anak-anak mereka untuk mengikuti pembelajaran di sekolah maupun di rumah. Program tersebut juga dihasrat untuk memperkembangkan lagi profesi dan kapasiti pegawai-pegawai dan guru-guru tempatan dalam memenuhi keperluan pelajar berkeperluan khas.

Penyampaian sijil kepada para peserta program telah disampaikan oleh Dayang Hajah Donnaliza binti Abdullah Puasa, Penolong Pengarah Urusan Yayasan Sultan Haji Hassanal Bolkiah pada 8 Safar 1440 bersamaan 17 Oktober 2018 di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan. ●





Bengkel Pengenalan Perusahaan Sosial

Yayasan Sultan Haji Hassanal Bolkiah telah menganjurkan bengkel sehari mengenai pengenalan terhadap Perusahaan Sosial (*Social Enterprise*) pada 15 Jamadilawal 1440 bersamaan 21 Januari 2019 di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan. Bengkel

bertajuk '*Social Enterprise Ideation: Heart of the Community - Making Social Enterprise Work*'.

Bengkel tersebut merupakan inisiatif Yayasan dalam mempelbagaikan pendekatan bagi menangani keperluan golongan yang memerlukan bantuan

melalui perusahaan sosial. Beberapa orang peniaga yang berpengalaman dalam bidang perusahaan sosial telah dijemput sebagai fasilitator bengkel bagi mengongsikan pengetahuan dan pengalaman masing-masing. Mereka terdiri daripada Tuan Elim Chiew, Pengasas @elimchiewtc; Puan Ernawaty Sorianto, Pengarah dan Ketua Eksekutif Project N Pte. Ltd.; Puan Larry Tchiou, Pengasas Bersama Women in Asia dan Pengasas UNFRAMED; dan Puan Vivian Lim, Pengasas Bersama Women in Asia.

Yang Berhormat Dayang Nik Hafimi binti Abdul Haadi, Ahli Majlis Mesyuarat Negara yang juga selaku ahli Jawatankuasa Pelan Strategik Yayasan hadir selaku tetamu kehormat dan melancarkan bangkel tersebut. Dayang Nik Hafimi menyatakan bahawa selain mempunyai pelbagai takrifan, perusahaan sosial secara ringkasnya bermaksud perniagaan yang didagangkan dengan hasrat untuk mengatasi masalah sosial, memberikan akses kepada



pekerjaan dan latihan atau membantu alam sekitar. Penggunaan kuasa pasaran untuk menangani penekanan masalah sosial juga dapat memberi manfaat lebih kepada masyarakat dan orang ramai selain daripada pemilik dan pemegang perusahaan tersebut.

Bengkel dihadiri oleh ahli-ahli perniagaan tempatan, wakil-wakil daripada jabatan kerajaan dan sektor swasta dan juga

badan-badan bukan kerajaan. Bengkel bertujuan untuk memberi gambaran dan ide mengenai perlaksanaan perusahaan sosial dan potensinya untuk dilaksanakan di negara ini. Yayasan juga berhasrat untuk membina kerjasama dengan pihak-pihak tertentu bagi mewujudkan dan mengembangkan perusahaan sosial dalam sama-sama membantu masyarakat yang memerlukan bantuan.

Turut hadir dalam bengkel tersebut ialah Yang Berhormat Awang Iswandy bin Ahmad, Ahli Majlis Mesyuarat Negara yang juga selaku ahli Jawatankuasa Pelan Strategik Yayasan; Yang Berhormat Dayang Khairunnisa binti Haji As'ari, Ahli Majlis Mesyuarat Negara dan Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah. ●





Tingkatkan Keupayaan Penerima Bantuan Keusahawan

Skim Pembiayaan Kebajikan (SPK) Yayasan Sultan Haji Hassanal Bolkiah bertujuan untuk memperkasakan dan mempertingkatkan keupayaan diri keluarga yang kurang berkemampuan agar dapat mencapai tahap kehidupan yang boleh menyara hidup keluarga dengan berdikari tanpa bergantung kepada bantuan secara berterusan. Melalui skim ini mereka yang mempunyai kebolehan fizikal dan minda serta mempunyai minat dalam bidang keusahawanan diberikan sokongan untuk menjalankan usaha perniagaan dengan diberikan bantuan daripada segi kewangan, peralatan, latihan dan pemantauan.

Yayasan dengan kerjasama LiveWIRE Brunei menganjurkan bengkel keusahawanan iaitu Bengkel Keusahawanan: 'BRIGHT IDEAS' (fasa pertama) dan Bengkel Keusahawanan:

'BUSINESS PLAN SERIES' (fasa kedua) khusus bagi para pemohon bantuan modal keusahawanan di bawah skim SPK Yayasan. Bengkel seumpama ini bertujuan untuk memastikan mereka benar-benar mempunyai kemampuan dan kemahiran dalam bidang perniagaan yang akan mereka ceburi. Kedua-dua bengkel ini merupakan program wajib bagi para pemohon sebelum mereka dipertimbangkan untuk menerima modal perusahaan atau perniagaan di bawah skim SPK Yayasan.

Pada 26 Jamadilawal 1440 bersamaan 1 Februari 2019, seramai 25 orang pemohon bantuan modal keusahawanan Yayasan iaitu daripada kohort terakhir 2018 telah menerima sijil penyertaan setelah menamatkan Bengkel Keusahawanan: 'BUSINESS PLAN SERIES' selama dua hari yang diadakan pada 25 Jamadilawal 1440 bersamaan 31 Januari 2019 hingga

26 Jamadilawal 1440 bersamaan 1 Februari 2019. Penyampaian sijil telah disempurnakan oleh Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah bertempat di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan.

Sementara itu, seramai 15 orang pemohon bantuan modal keusahawanan Yayasan bagi kohort pertama tahun 2019 telah mengikuti Bengkel Keusahawanan: 'BRIGHT IDEAS' selama dua hari iaitu pada 20 dan 21 Rejab 1440 bersamaan 27 dan 28 Mac 2019 di Dewan Serbaguna, Kompleks Yayasan Sultan Haji Hassanal Bolkiah, Bandar Seri Begawan. Mereka seterusnya akan mengikuti Bengkel Keusahawanan: 'BUSINESS PLAN SERIES' yang akan diadakan pada pertengahan bulan April 2019 nanti sebelum dipertimbangkan untuk diserap dalam skim SPK Yayasan. ●

Bengkel Ivy League bagi Sultan's Scholar



Sultan's Scholar merupakan biasiswa berprestij yang dianugerahkan kepada pelajar cemerlang dalam pelbagai bidang bagi mengikuti pengajian di universiti berprestij di luar negara yang dibenarkan oleh Yayasan Sultan Haji Hassanal Bolkiah dan diiktiraf oleh Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam.

Pada setiap tahun Yayasan membuat penelitian dan pemilihan calon-calon berdasarkan kriteria dan syarat yang sedia ada. Pemilihan ditahap ini adalah kritikal kerana penerima biasiswa Sultan's Scholar ini nanti adalah diharatkan untuk memegang jawatan penting dalam pelbagai bidang apabila tamat pengajian dan menjadi pelapis pemimpin yang berwibawa serta seterusnya akan berperanan terhadap kemajuan dan pembangunan negara selaras dengan Wawasan Brunei 2035 - bagi melahirkan rakyat yang berpendidikan dan berkemahiran tinggi ke arah kehidupan rakyat berkualiti tinggi.

Salah satu syarat yang dikenakan kepada calon penerima biasiswa Sultan's Scholar ialah mereka hendaklah diterima oleh

universiti ternama dalam kedudukan kelima tertinggi (*Top 5 Ranking*) bagi universiti di United Kingdom dan kedudukan kesepuluh tertinggi (*TOP 10 ranking*) bagi universiti di seluruh dunia.

Kemasukan ke universiti-universiti ternama ini amatlah kompetitif dan memerlukan seseorang calon bukan saja memiliki keputusan akademik cemerlang, malah cemerlang dalam pelbagai aspek terutama dari sudut kepimpinan. Walau bagaimanapun, peluang untuk diterima ke universiti-universiti berkenaan tidaklah mustahil. Setakat ini, penerima biasiswa Sultan's Scholar telah berjaya menempatkan empat orang pelajar di Universiti Oxford dan tiga di Universiti Cambridge.

Yayasan Sultan Haji Hassanal Bolkiah secara berterusan memberikan biasiswa Sultan's Scholar dan memberi khidmat bantu kepada pelajar-pelajar yang berpotensi dalam mempersiapkan diri memenuhi kehendak dan syarat kelayakan universiti ternama tersebut. Bengkel Ivy League: Urusan Permohonan Ke Universiti Terunggul adalah merupakan antara usaha ke arah ini.

Bengkel Ivy League buat julung kalinya diadakan pada 14 Rabiulawal 1440 bersamaan 22 November 2018, di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan. Bengkel bertujuan untuk memberi panduan kepada pelajar A & AS Level tentang keistimewaan universiti terunggul, jenis-jenis kursus dan bidang pengajian, tatacara memohon ke Universiti Oxford dan Cambridge (Oxbridge) dan universiti terunggul di Amerika Syarikat seperti Universiti Harvard dan Universiti Yale. Universiti Oxford dan Cambridge serta universiti terunggul di Amerika Syarikat merupakan institusi pengajian tinggi yang amat jarang dipilih para pelajar dari negara ini walaupun mereka mempunyai kelulusan akademik yang cemerlang dan setanding dengan pencapaian pelajar lain di luar negara.

Fasilitator yang dijemput bagi mengendalikan bengkel ialah Raymond George, Pegawai Pelajaran selaku Guru Kerjaya dari CFBT Brunei dan wakil-wakil dari Kedutaan Amerika Syarikat di Negara Brunei Darussalam, iaitu Tuan Daniel Lee, Public Affairs Officer dan Puan Mayra Robles, Education USA Advisor.

Bengkel tersebut telah dihadiri oleh seramai 100 orang pelajar dan guru-guru kerjaya dari Pusat Tingkatan Enam di seluruh negara termasuk pelajar-pelajar dari Jerudong International School dan International School Brunei. ☺



Perkhemahan Belia Tingkatkan Kemahiran Kepimpinan

Salah satu inisiatif Yayasan Sultan Haji Hassanal Bolkiah dalam usaha mempertingkatkan penglibatan dan penyertaan belia dalam pembangunan masyarakat adalah dengan menganjurkan program perkhemahan belia. Program Perkhemahan Hijrah Mahabbah Lillah dan Kem Belia Harapan: "Hero Within" adalah antara perkhemahan belia yang telah dianjurkan oleh Yayasan. Perkhemahan ini bertujuan untuk

membina dan meningkatkan sifat-sifat kepimpinan dan mengasah keperibadian luhur para belia daripada segi rohani dan jasmani melalui aktiviti-aktiviti yang bersesuaian.

Program Perkhemahan Hijrah Mahabbah Lillah merupakan kali keenam dianjurkan oleh Yayasan dengan kerjasama Kumpulan Al-Qudwah iaitu terdiri daripada mahasiswa dan

mahasiswa Universiti Sultan Sharif Ali (UNISSA) selaku pengendali program. Perkhemahan belia tersebut diadakan selama empat hari tiga malam bermula 26 Rabiulawal 1440 bersamaan 4 Disember 2018 hingga 29 Rabiulawal 1440 bersamaan 7 Disember 2018 di Kolej Kediaman Mahasiswa, UNISSA. Perkhemahan yang bertemakan "Cahaya Penyuluhan Hidup" disertai oleh seramai 96 orang pelajar lelaki berumur 14 hingga 17 tahun dari beberapa buah institusi dan sekolah di seluruh negara.

Antara perisian atau aktiviti dalam program Perkhemahan Hijrah Mahabbah Lillah kali ke-6 ialah ceramah motivasi, bengkel kerohanian, aktiviti kepimpinan, aktiviti gotong-royong, sukan dan riadah. Aktiviti-aktiviti tersebut diadakan adalah untuk meningkatkan keimanan dan jati diri para peserta melalui pendekatan Al-Quran dan As-Sunnah, serta menanamkan sikap bertanggungjawab dan amanah di samping menguji kemampuan dan ketahanan mental, emosi dan fizikal setiap peserta. Program perkhemahan ditutup dengan acara penyampaian sijil yang disempurnakan oleh Yang Berhormat Awang Iswandy bin Ahmad, Ahli Majlis Mesyuarat Negara yang juga selaku ahli Jawatankuasa Pelan Strategik Yayasan. Penyampaian Sijil diadakan di Majlis Penutup Program Perkhemahan Hijrah Mahabbah Lillah





Kali Ke-6 yang diadakan di Auditorium, Universiti Sultan Sharif Ali pada 29 Rabiulawal 1440 bersamaan 7 Disember 2018.

Kem Belia Harapan: "Hero Within" pula dianjurkan oleh Yayasan dengan kerjasama Kumpulan Belia Syababul Iman Masjid Sultan Sharif Ali. Perkhemahan tersebut telah diadakan selama empat hari tiga malam bermula dari 21 Rejab 1440 bersamaan 28 Mac 2019 hingga 24 Rejab 1440 bersamaan

31 Mac 2019 di kawasan Masjid Sultan Sharif Ali.

Program perkhemahan tersebut dikendalikan oleh Kumpulan Belia Syababul Iman Masjid Sultan Sharif Ali, Kampung Sengkurong sempena cuti penggal pertama persekolahan 2019. Program disertai oleh seramai 101 orang belia yang terdiri daripada 50 orang lelaki dan 51 orang perempuan yang berumur antara 13 hingga 17 tahun dari seluruh Daerah Brunei dan Muara.

Aktiviti-aktiviti yang diatur semasa perkhemahan bertujuan bagi mengasah sifat kepimpinan yang selaras dengan ajaran agama Islam.

Majlis Pelancaran Kem Belia Harapan: "Hero Within" telah disempurnakan oleh Awang Haji Musthapa bin Haji Matahir, Penolong Pengarah Urusan Yayasan Sultan Haji Hassanal Bolkiah pada 22 Rejab 1440 bersamaan 29 Mac 2019 di Masjid Sultan Sharif Ali, Kampung Sengkurong. ●



Sambutan Maulidur Rasul



Menjelang 12 Rabiulawal pada setiap tahun, umat Islam di seluruh dunia menyemarakkan Sambutan Maulidur Rasul bagi memperingati kelahiran junjungan besar Nabi Muhammad Sallallahu 'Alaihi Wassalam.

Di Negara Brunei Darussalam, Sambutan Maulidur Rasul peringkat kebangsaan disambut secara serentak di keempat-empat daerah di seluruh negara dengan acara perhimpunan dan perarakan pada 12 Rabiulawal. Pelbagai program

keagamaan juga diadakan sepanjang bulan Rabiulawal bagi melahirkan kecintaan terhadap junjungan besar Nabi Muhammad Sallallahu 'Alaihi Wassalam antaranya ialah mengadakan Dikir Maulud selama 12 malam berturut-turut bermula pada 1 Rabiulawal di masjid-masjid dan surau-surau seluruh negara. Di samping itu, beberapa acara ceramah dan forum agama juga diadakan bagi menyemarakkan lagi sambutan ini.

Pegawai-pegawai dan kakitangan lelaki Yayasan Sultan Haji Hassanal Bolkiah tidak ketinggalan menyertai acara perhimpunan dan perarakan Maulidur Rasul 1440/2018 peringkat kebangsaan yang diadakan pada 12 Rabiulawal 1440 bersamaan 20 November 2018 di Taman Haji Sir Muda Omar 'Ali Saifuddien, Bandar Seri Begawan. Pasukan Yayasan diketuai oleh Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah. Para peserta perarakan berarak secara tertib sambil berselawat ke atas Nabi sekali gus menyegarkan ingatan terhadap Rasullullah Sallallahu 'Alaihi Wassalam. ●





Warga Kerja Yayasan Sertai Sambutan Hari Kebangsaan Ke-35

'Menjayakan Wawasan Negara' menjadi tema Sambutan Ulang Tahun Hari Kebangsaan Negara Brunei Darussalam Ke-35. Upacara Perhimpunan Agung Sambutan Ulang Tahun Hari Kebangsaan Negara Brunei Darussalam Ke-35 yang telah berlangsung pada 18 Jamadilakhir 1440 bersamaan 23 Februari 2019 di Taman Haji Sir Muda Omar 'Ali Saifuddien, Bandar Seri Begawan. Upacara Perhimpunan Agung diserikan dengan acara perbarisan lalu dan persembahan padang yang disertai oleh lebih 25 ribu orang peserta.

Dengan semangat patriotisme dan nasionalisme yang tinggi kepada raja dan negara, seramai 200 orang warga kerja Yayasan Sultan Haji Hassanal Bolkiah dan 100 orang sukarelawan Yayasan Sultan Haji Hassanal Bolkiah telah ikut serta dalam acara perbarisan lalu di

bawah Kluster Sosioekonomi. Pasukan Yayasan diketuai oleh Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah.

Hari Kebangsaan Negara Brunei Darussalam diperingati kerana ia merupakan titik penting dalam sejarah negara dan selepas 35 tahun negara kita menikmati kemakmuran di bawah kepimpinan seorang Raja berdaulat dan berjiwa rakyat.

Seluruh warga kerja Yayasan Sultan Haji Hassanal Bolkiah menzahirkan taat setia yang tidak berbelah bahagi Ke Hadapan Majlis Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang

Di-Pertuan Negara Brunei Darussalam atas kepimpinan bijaksana Baginda menjadikan Negara Brunei Darussalam sentiasa dalam keadaan aman, makmur dan sejahtera.

Yayasan sebagai sebuah organisasi, wadah amal jariah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah dan ahli kerabat Diraja Baginda akan terus menanai dan menggembung usaha bersama-sama dengan pelbagai sektor yang berkepentingan dalam membangun negara bagi memastikan matlamat Wawasan Brunei 2035 tercapai dan menjadikan Negara Brunei Darussalam tetap kekal sebagai sebuah negara yang merdeka lagi berdaulat, menjadi sebuah Negara Zikir dan Baldatun Tayyibatun Warabbun Ghafur. ●





Mesyuarat Penyelarasan Pembahagian Buah Kurma Kurnia Peribadi KDYMM

Untuk memastikan kelancaran dalam pengendalian pembahagian buah kurma Kurnia Peribadi Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam kepada seluruh rakyat dan penduduk Islam di Negara Brunei Darussalam sempena bulan Ramadan tahun 1440/2019, satu Mesyuarat Penyelarasan Pembahagian Buah Kurma Kurnia Peribadi Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah telah diadakan pada 14 Rejab 1440 bersamaan 21 Mac 2019 di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan.

Mesyuarat tersebut telah dipengerusikan oleh Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah. Antara yang terlibat dalam mesyuarat pengendalian pembahagian buah kurma ialah wakil

dari Jabatan-jabatan Kerajaan yang terdiri daripada Pegawai-pegawai Daerah dan pegawai-pegawai dari Jabatan Kastam dan Eksais Diraja, Jabatan Pelabuhan, Jabatan Radio dan Televisyen Brunei, Jabatan Penerangan, Angkatan Bersenjata Diraja Brunei, Pasukan Polis Diraja Brunei serta pegawai-pegawai Yayasan.

Antara agenda yang dibincangkan dalam mesyuarat berkenaan adalah tatacara pengagihan dan pelantikan Urus Setia dan Ahli-ahli Jawatankuasa bagi menyelaraskan pembahagian buah kurma Kurnia Peribadi Kebawah Duli Yang Maha Mulia. Mesyuarat tersebut juga memberikan peluang pihak-pihak yang berkenaan mengetengahkan ide serta perkongsian amalan-amalan terbaik bagi meningkatkan keberkesanan khidmat pengagihan buah kurma kepada umat Islam di seluruh negara.

Yayasan Sultan Haji Hassanal Bolkiah menyediakan borang khas yang diedarkan melalui Ketua-ketua Kampung di seluruh negara. Mereka yang telah diberi mandat serta tanggungjawab

dalam pengagihan buah kurma Kurnia Peribadi tersebut diharap akan dapat mengikuti tatacara pembahagian yang telah ditetapkan dan memastikan agar buah kurma Kurnia Peribadi diterima dengan baik dan sempurna serta dapat dinikmati sebagai juadah berbuka puasa oleh setiap umat Islam di negara ini tanpa mengira had umur dan taraf kerakyatan.

Bagi tahun 1440/2019 ini, sejumlah 126 metrik ton buah kurma jenis Safawy yang dibekalkan oleh Al-Madinah Dates Company dari Arab Saudi akan diagih-agihkan kepada setiap umat Islam di negara ini. Setiap seorang akan menerima satu kotak yang mengandungi 300 gram buah kurma.

Pembahagian buah kurma akan bermula dengan Majlis Pelancaran Pengagihan Kurma Kurnia Peribadi Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam sempena Bulan Ramadan 1440/2019. ●



Promosi Biasiswa Sultan's Scholar dalam Ekspos Pengajian Tinggi

Yayasan Sultan Haji Hassanal Bolkiah menerima undangan daripada Kementerian Pendidikan bagi menyertai Ekspos Pengajian Tinggi 2019. Ekspos berlangsung selama dua hari bermula pada 11 Jamadilawal 1440 bersamaan 16 Februari 2019 di Dewan Bridex, Jerudong. Ekspos Pengajian Tinggi 2019 merupakan *One Stop Information Centre*,


sebagai salah satu usaha pemberigaan pelbagai laluan ke institusi pengajian tinggi dan peluang-peluang tawaran pendidikan di dalam dan di luar negara melalui pameran, konsultasi, forum dan seminar.

Ekspos disertai institusi-institusi pengajian tinggi kerajaan dan swasta

dari dalam dan luar negara, agensi dalam negara yang menawarkan program pendidikan, dermasiswa pendidikan dan beberapa buah perwakilan luar negara. Expo memberikan peluang terbaik bagi pelajar-pelajar yang berhasrat untuk meneruskan pengajian serta latihan dalam dan luar negara untuk mendapatkan maklumat terperinci mengenai pelbagai program, kursus dan kemudahan yang ditawarkan di bawah satu bumbung.

Kesempatan ini dimanfaatkan oleh Yayasan untuk memberiagakan Skim Biasiswa Sultan's Scholar seperti maklumat mengenai syarat dan kriteria, ekspektasi Yayasan, proses dan prosedur pemilihan serta keistimewaan biasiswa Sultan's Scholar. Beberapa orang penerima biasiswa Sultan's Scholar juga dijemput hadir bagi mengongsikan persediaan dan pengalaman mereka mengikuti pengajian di universiti ternama di seluruh dunia seperti penyediaan dokumen peribadi seperti Personal Statement dan Resume (CV) yang dikenyatakan oleh pihak universiti dan seterusnya memberikan motivasi dan panduan kepada para pelajar untuk meneruskan pengajian mengikuti bidang yang diminati. ●





Sumbangan Peralatan dan Keperluan Sekolah

Selaras dengan tujuan Yayasan Sultan Haji Hassanal Bolkiah bagi memeduli kebaikan dan kesejahteraan rakyat khususnya mereka yang kurang berkemampuan, Yayasan telah menyampaikan sumbangan peralatan dan keperluan sekolah bagi sesi persekolahan tahun 2019 kepada seramai 1,072 pelajar daripada 367 buah keluarga yang kurang berkemampuan.

Sumbangan tersebut dihasratkan bagi memeduli hal ehwal pendidikan pelajar-pelajar yang kurang berkemampuan di samping membantu meringankan beban perbelanjaan keluarga dalam menyediakan keperluan persekolahan anak-anak mereka khususnya bagi persediaan penggal awal persekolahan tahun 2019.

Sumbangan adalah dalam bentuk kupon yang bernilai BND73.00 bagi setiap pelajar sekolah rendah dan BND84.00 bagi setiap pelajar sekolah menengah. Penyampaian sumbangan diadakan dalam tiga buah majlis berasingan.

Pada 10 Rabiulakhir 1440 bersamaan 18 Disember 2018, sumbangan disampaikan kepada seramai 356 orang pelajar daripada 124 buah keluarga yang terdiri daripada 206 orang pelajar sekolah rendah dan 150 orang pelajar sekolah menengah. Sumbangan tersebut disampaikan oleh Dr. Dayang Hajah May Fa'ezah binti Haji Ahmad Ariffin, Setiausaha Tetap (Ekonomi), Kementerian Kewangan dan Ekonomi, selaku ahli Jawatankuasa Meneliti Bantuan Yayasan Sultan Haji Hassanal Bolkiah.

Majlis penyampaian sumbangan yang diadakan pada 11 Rabiulakhir 1440 bersamaan 19 Disember 2018, seramai 360 orang pelajar daripada 119 buah keluarga yang terdiri daripada 220 orang pelajar sekolah rendah dan 140 orang pelajar sekolah menengah menerima sumbangan mereka. Manakala pada majlis penyampaian sumbangan pada 13 Rabiulakhir 1440 bersamaan 21 Disember 2018, seramai 356 orang pelajar daripada 124 buah keluarga yang terdiri daripada 202 orang pelajar sekolah rendah dan 154 orang pelajar sekolah menengah menerima sumbangan masing-masing. Sumbangan bagi kedua-dua majlis tersebut disampaikan oleh Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah. ●





Sumbangan Yayasan Ringankan Beban Mangsa Kebakaran

Atas keprihatinan terhadap kebijakan dan kesejahteraan keluarga yang ditimpa musibah kebakaran rumah, Yayasan Sultan Haji Hassanal Bolkiah tampil menghulurkan sumbangan kewangan dan bantuan makanan asasi bagi meringankan beban mereka untuk kembali meneruskan kehidupan sehari-hari.

Pada 18 Rejab 1440 bersamaan 25 Mac 2019 Yayasan menyampaikan

sumbangan kepada dua buah keluarga yang terlibat dalam kebakaran rumah di Kampong Bebuloh, Mukim Pengkalan Batu. Sumbangan tersebut diterima oleh ketua keluarga yang terlibat iaitu Dayang Damit binti Haji Bustan dan Awang Hafizchin bin Abdullah.

Sementara itu, dua buah keluarga yang terlibat dalam kebakaran rumah di Kampong Padnunok, Mukim Kiudang, Daerah Tutong juga menerima

sumbangan daripada Yayasan pada 19 Rejab 1440 bersamaan 26 Mac 2019. Mereka ialah keluarga Awang Haji Musa bin Haji Metussin @ Haji Matasin dan Awang Md. Sahriful Hafiz bin Md. Yusri.

Kesemua sumbangan Yayasan disampaikan oleh Awang Haji Musthapa bin Haji Matahir, Penolong Pengarah Urusan Yayasan Sultan Haji Hassanal Bolkiah. ●





Kunjungan daripada Pengerusi Eksekutif Yayasan RESTU, Malaysia

Yang Berhormat Pehin Datu Lailaraja Mejar Jeneral (B) Dato Paduka Seri Haji Awang Halbi bin Haji Mohd Yussof, Menteri Pertahanan Kedua selaku Pengerusi Lembaga Pengarah Yayasan Sultan Haji Hassanal Bolkiah telah

menerima kunjungan hormat daripada Datuk Abdul Latiff bin S. Mirasa, Pengerusi Eksekutif Yayasan RESTU, Malaysia pada 6 Rabiulakhir 1440 bersamaan 14 Disember 2018.

Yayasan Sultan Haji Hassanal Bolkiah dan Yayasan RESTU telah pun menjalin hubungan kerjasama melalui Memorandum Persefahaman yang ditandatangani pada 10 Disember 2012. Memorandum tersebut bertujuan bagi membolehkan pelajar-pelajar dari Negara Brunei Darussalam khususnya yang dibiayai oleh Yayasan untuk mengikuti program Diploma Seni Mushaf yang disediakan oleh Kolej RESTU di Shah Alam, Malaysia. Melalui Memorandum Persefahaman tersebut, Yayasan telah membiayai seramai 11 orang pelajar bagi mengikuti program diploma tersebut dan seramai tujuh orang lepasan pelajar berkenaan telah bertugas di Pusat Pengajian Kesenian dan Kaligrafi Islam, Yayasan Sultan Haji Hassanal Bolkiah.

Yang Mulia Datuk Abdul Latiff bin S. Mirasa juga membuat perjumpaan bersama Dato Paduka Eddie bin Dato Paduka Haji Sunny, Pengarah Urusan Yayasan dan para lepasan kolej berkenaan dan membuat lawatan ke Pusat Pengajian Kesenian dan Kaligrafi Islam, Yayasan Sultan Haji Hassanal Bolkiah, di Rumah Semaun, Jalan Jerambak. ●





Lawatan Peserta Kursus Akademi Pertahanan ABDB

Seramai 62 orang pegawai tentera yang mengikuti Kursus Pegawai Staf Rendah di Pusat Kepimpinan dan Pengurusan, Akademi Pertahanan Angkatan Bersenjata Diraja Brunei (PKP AP ABDB)

dan diiringi oleh lapan orang pegawai juruarah mereka, telah membuat lawatan sambil belajar ke Kompleks Yayasan Sultan Haji Hassanal Bolkiah pada 10 Safar 1440 bersamaan 19 Oktober 2018.

Lawatan yang bertemakan 'Wawasan Brunei 2035 - *High Quality of Life*' bertujuan untuk mengetahui fungsi dan peranan Yayasan dalam menyokong Wawasan Brunei 2035.



Merujuk kepada Aliran Pensejajaran menuju Matlamat Wawasan Brunei 2035, Yayasan sebagai badan amal turut memikul tanggungjawab mendukung kejayaan Wawasan Brunei 2035 melalui lima tujuan utama penubuhannya dalam bidang Agama, Kebajikan, Pendidikan, Pembangunan dan Kewangan. Projek dan aktiviti Yayasan secara tidak langsung menyumbang kepada Pencapaian Hasil Kebangsaan Wawasan Brunei 2035. Dalam membuat perancangan dan melaksanakan segala program dan projek, Yayasan sentiasa mendukung penuh agenda pembangunan negara sejajar dengan matlamat Wawasan Brunei 2035. ●



Lawatan Pelajar Namseoul University, Korea Selatan

Pada 22 Jamadilawal 1440 bersamaan 28 Januari 2019, Yayasan Sultan Haji Hassanal Bolkiah telah menerima lawatan daripada seramai 14 orang pelajar dalam bidang Kebajikan Masyarakat (*Social Welfare*) dan seorang pensyarah dari Namseoul University, Korea Selatan. Lawatan tersebut merupakan program sampingan daripada Program Lawatan Sambil Belajar antara Namseoul University dengan Institut Pendidikan Sultan Hassanal Bolkiah, Universiti Brunei Darussalam.

Antara tujuan program lawatan adalah untuk mendapatkan pengalaman dan maklumat mengenai polisi dan program kebajikan kanak-kanak dalam bidang pendidikan di samping mengenali adat dan budaya kehidupan masyarakat di negara ini.

Dalam lawatan tersebut, Dayang Hajah Donnaliza binti Abdullah Puasa, Penolong Pengarah Urusan, mewakili Yayasan telah mengongsikan maklumat mengenai program dan projek dalam bidang pendidikan khususnya bantuan dan sokongan Yayasan terhadap anak-anak daripada keluarga yang kurang berkemampuan seperti Program Intervensi Pendidikan (PIP). PIP merupakan inisiatif Yayasan yang bertujuan untuk membentuk masyarakat yang berpendidikan dan berilmu serta mempunyai daya saing dan bermotivasi. Projek-projek yang dikendalikan dalam PIP diharap dapat meningkatkan taraf kehidupan rakyat melalui peningkatan pencapaian pendidikan supaya dapat memecah lingkaran kebergantungan masyarakat kepada bantuan kebajikan. Antara projek-projek PIP ialah projek kelas tuisyen, projek kemahiran keibubapaan dan projek sarapan pagi. ●



Lawatan Peserta Misi Sukarelawan Antarabangsa

Yayasan Sultan Haji Hassanal Bolkiah telah menerima kunjungan daripada rombongan pelajar yang mengikuti Misi Sukarelawan Antarabangsa (Relawangsa), Program Mobiliti Outbound Universiti Selangor (UNISEL) - Universiti Islam Sultan Sharif Ali (UNISSA) pada 12 Rejab 1440 bersamaan 19 Mac 2019 di Dewan Serba Guna,

Kompleks Yayasan Sultan Haji Hassanal Bolkiah.

Yayasan telah menyampaikan penerangan mengenai peranan dan projek yang dikendalikan oleh sukarelawan Yayasan dalam memberikan khidmat bantuan kepada masyarakat yang disampaikan oleh Awang Haji

Alimas bin Haji Md. Ali, Pegawai Penyelaras Sukarelawan Yayasan Sultan Haji Hassanal Bolkiah. Turut hadir semasa lawatan tersebut ialah Awang Haji Musthapa bin Haji Matahir, Penolong Pengarah Urusan Yayasan Sultan Haji Hassanal Bolkiah. ●





Peraduan Menulis Seni Khat dan Mewarna

Pusat Pengajian Kesenian dan Kaligrafi Islam Yayasan Sultan Haji Hassanal Bolkiah (PPKKI YSHHB) telah mengikuti Pameran Jejak Seni Bina Islam Sempena Bandar Seri Begawan Ibu Negara Ketamadunan Islam bagi Rantau Asia 2019 yang berlangsung selama sepuluh hari bermula pada 8 Rejab 1440 bersamaan 15 Mac 2019 di ruang legar Blok B Kompleks Yayasan Sultan Haji Hassanal Bolkiah, Bandar Seri Begawan.

Sepanjang pameran tersebut, PPKKI YSHHB telah menganjurkan Peraduan Menulis Seni Khat yang terbuka kepada

orang ramai dan Peraduan Mewarna bagi kanak-kanak yang berumur di bawah 12 tahun. Peraduan tersebut diadakan selama dua hari, iaitu pada 15 Rejab 1440 bersamaan 22 Mac 2019 hingga 17 Rejab 1440 bersamaan 24 Mac 2019.

Peraduan tersebut dianjurkan selaras dengan tujuan penubuhan PPKKI YSHHB iaitu sebagai sebuah pusat yang melahirkan tenaga pakar dari kalangan belia Islam tempatan dalam bidang seni Islam khususnya seni mushaf, kaligrafi dan seni hiasan Islam serta menyokong usaha kerajaan dalam sama-sama

meninggikan syiar Islam di Negara Brunei Darussalam dengan menerokai bidang seni Islam sekali gus sebagai salah satu usaha membangun Negara Zikir.

Majlis Penyampaian Hadiah Peraduan Menulis Seni Khat dan Mewarna telah disempurnakan oleh Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah pada 17 Rejab 1440 bersamaan 24 Mac 2019. ●





Program Induksi Sukarelawan

Unit Sukarelawan Yayasan Sultan Haji Hassanal Bolkiah telah mengadakan program induksi bagi para sukarelawan yang baru mendaftar. Program induksi diadakan pada 3 Rejab 1440 bersamaan 10 Mac 2019 di Dewan Serba Guna, Sekolah Menengah Yayasan Sultan Haji Hasanal Bolkiah. Para sukarelawan diberikan penerangan mengenai peranan

dan tanggungjawab para sukarelawan Yayasan dan projek-projek Yayasan yang akan melibatkan penyertaan para sukarelawan bagi sepanjang tahun 2019. Sesi kongsi sama pengalaman para sukarelawan yang telah lama melibatkan diri dalam projek-projek Yayasan juga diadakan.

Unit Sukarelawan sentiasa membuka pendaftaran kepada orang ramai yang berminat untuk menyumbang khidmat bakti bersama-sama menjayakan projek dan aktiviti Yayasan. Para sukarelawan Yayasan terdiri daripada para profesional, belia dan para pelajar. ●



Ekspo Khidmat Masyarakat UNISSA

Unit Sukarelawan Yayasan telah menyertai Ekspo Khidmat Masyarakat yang dianjurkan oleh Universiti Islam Sultan Sharif Ali (UNISSA) pada 16 Rejab 1440 bersamaan 23 Mac 2019. Ekspo tersebut bertujuan untuk memberi

pendedahan mengenai kesukarelawanan dan khidmat masyarakat kepada pelajar-pelajar UNISSA untuk menceburkan diri dalam bidang kesukarelawanan. Melalui aktiviti kesukarelawanan, para pelajar diharap akan dapat memupuk nilai-

nilai sosial yang positif dan membantu mereka untuk mencari ruang dalam memberikan khidmat bakti daripada segi tenaga, pengetahuan baharu dan ilmu. ●

Aktiviti Kemasyarakatan Membersihkan Masjid

Pada 15 Rejab 1440 bersamaan 22 Mac 2019, para sukarelawan Yayasan bersama-sama ahli Jawatankuasa Takmir Masjid Yayasan Sultan Haji Hassanal Bolkiah mengadakan aktiviti kemasyarakatan

membersihkan masjid dan sekitar Masjid Yayasan Sultan Haji Hassanal Bolkiah di Kampong Bolkiah 'A'. Turut sama dalam aktiviti kemasyarakatan tersebut ialah para pelajar Universiti Selangor (UNISEL),

Malaysia dan Universiti Islam Sultan Sharif Ali (UNISSA), Brunei Darussalam yang mengikuti Misi Sukarelawan Antarabangsa (RELAWANGSA). ●





Pelancaran SMS Brunei Prihatin bagi DANA

Majlis Pelancaran SMS Brunei Prihatin bagi Dana Pengiran Muda Mahkota Al-Muhtadee Billah Untuk Anak-Anak Yatim (DANA) Tahun 2018-2019 telah diadakan pada 18 Rabiulawal 1440 bersamaan 26 November 2018 di Dewan Serba Guna, Kompleks Yayasan Sultan Haji Hassanal Bolkiah.

Yang Berhormat Pehin Datu Lailaraja Mejai Jeneral (B) Dato Paduka Seri Haji Awang Halbi bin Haji Md. Yussof, Menteri Pertahanan Kedua selaku Timbalan Pengurus 1 Lembaga Pemegang Amanah DANA hadir selaku tetamu kehormat dan melancarkan SMS Brunei Prihatin bagi DANA Tahun 2018-2019.



SMS Brunei Prihatin bagi DANA merupakan salah satu usaha DANA dalam mempelbagaikan cara atau mekanisme yang mudah untuk orang ramai menyalurkan sumbangan ikhlas mereka, khusus kepada anak-anak yatim di negara ini. Projek ini juga dihasratkan untuk meningkatkan rasa pemedulian dan kasih sayang dalam kalangan masyarakat dengan menghulurkan sedekah yang ikhlas kepada anak-anak yatim.

Projek SMS Brunei Prihatin bagi DANA tahun 2018-2019 merupakan kali ke-13 seumpamanya diadakan sejak projek tersebut mula diungkayahkan pada penghujung tahun 2006. Projek tersebut berjalan selama 67 hari iaitu bermula dari 26 November 2018 hingga 31 Januari 2019.

Seperti tahun-tahun sebelumnya, pihak DANA dapat mengendalikan projek tersebut dengan bantuan dan kerjasama dari agensi kerajaan dan swasta. Radio dan Televisyen Brunei (RTB) bertindak sebagai penyalur maklumat melalui siaran televisyen dan rangkaian radio.

Beberapa buah agensi kerajaan lain juga turut serta dalam usaha memberi maklumat kepada orang ramai seperti Jabatan Hal Ehwal Masjid melalui khutbah Jumaat dan Jabatan Penerangan melalui akhbar Pelita Brunei. Selain itu, beberapa buah pawagam juga memberi sokongan padu melalui khidmat penayangan promo SMS Brunei Prihatin bagi DANA.

Sementara itu, dua buah syarikat telekomunikasi iaitu DST dan Syarikat Progresif Cellular Sdn. Bhd. pula memberikan khidmat SMS percuma bagi projek ini. Orang ramai yang berhasrat untuk membuat sumbangan hanya perlu menaip kata laluan DANA, diikuti dengan jumlah sumbangan sama ada BND1.00 atau BND5.00 atau BND10.00 atau BND15.00 atau BND20.00. ●



Penyampaian Bantuan Persekolahan bagi Anak Yatim

Seramai 3,717 orang anak yatim di seluruh negara menerima bantuan peralatan dan keperluan persekolahan daripada Dana Pengiran Muda Makota Al-Muhtadee Billah Untuk Anak-Anak Yatim (DANA). Penyampaian bantuan tersebut telah diadakan pada 18 Rabiulawal 1440 bersamaan 26 November 2018 di Dewan Serba Guna, Kompleks Yayasan Sultan Haji Hassanal Bolkiah, Bandar Seri Begawan.

Bantuan tersebut diberikan dalam bentuk kupon pembelian peralatan dan keperluan persekolahan yang bernilai sebanyak BND70.00 bagi setiap anak yatim. Kupon-kupon tersebut sah digunakan di 30 buah syarikat yang

dilantik di keempat-empat buah daerah seperti kedai-kedai buku dan kedai-kedai barang keperluan harian kanak-kanak bagi anak yatim yang belum bersekolah.

Bantuan dalam bentuk kupon tersebut telah disampaikan oleh Yang Berhormat Pehin Datu Lailaraja Mejar Jeneral (B) Dato Paduka Seri Haji Awang Halbi bin Haji Md. Yussof, Menteri Pertahanan Kedua selaku Timbalan Pengerusi 1 Lembaga Pemegang Amanah DANA kepada Pegawai-Pegawai Daerah dari keempat-empat daerah. Kupon-kupon tersebut akan diserahkan kepada ketua-ketua kampung dan seterusnya akan menyerahkan kepada anak-anak yatim kampung masing-masing.

Sumbangan bantuan peralatan dan keperluan persekolahan dihasrat akan dapat memberi galakan dan kesedaran dalam kalangan anak yatim untuk menghargai kepentingan pendidikan dalam kehidupan mereka pada masa hadapan dan seterusnya memberi dorongan untuk mempertingkatkan pencapaian pendidikan mereka. Di samping itu, bantuan tersebut diharap dapat meringankan beban perbelanjaan bagi ibu dan penjaga mereka khususnya dalam menyediakan keperluan persekolahan bagi penggal awal persekolahan tahun 2019. ●



Penyampaian Hadiah Kecemerlangan Akademik bagi Peperiksaan BC-GCE Peringkat 'O'

Seramai 37 pelajar Sekolah Menengah Yayasan menerima sijil dan hadiah masing-masing pada Majlis Penyampaian Anugerah Pelajar Cemerlang Sekolah Menengah Yayasan Sultan Haji Hassanal Bolkiah bagi BC-GCE Peringkat 'O' tahun 2018. Majlis tersebut diadakan pada 6 Rejab 1440 bersamaan 13 Mac 2019 di Dewan Serba Guna Sekolah Menengah Yayasan.

Hadir selaku tetamu kehormat bagi menyempurnakan penyampaian sijil dan hadiah kepada para pelajar ialah Setiausaha Tetap (Pentadbiran dan Kewangan), Kementerian Pembangunan, Dr. Dayang Nor Imtihan binti Haji Abdul Razak selaku Ahli Lembaga Pengarah Yayasan Sultan Haji Hassanal Bolkiah dan Ahli Lembaga Tadbir Sekolah Yayasan Sultan Haji Hassanal Bolkiah.

Awangku Md. Nukman Syawqi bin Pengiran Md. Salimin yang telah memperoleh 9 Kepujian dalam Peperiksaan BC-GCE Peringkat 'O' 2018 telah dianugerahkan sebagai pelajar terbaik. Anugerah khas juga telah diberikan kepada Awang Muhammad Hannan Qadir bin Abdullah yang menjadi sukarelawan sebagai jurugambar dan juruvideo sepanjang beliau menjadi pelajar hingga menamatkan pengajian di Sekolah Menengah Yayasan. Guru-guru yang mengajar mata pelajaran bagi Peperiksaan BC-GCE Peringkat 'O' 2018 juga menerima sijil penghargaan. ●



Program Pertukaran Pelajar - River Valley High School

Program Tahunan Pertukaran Pelajar adalah merupakan salah satu program antarabangsa Sekolah Menengah Yayasan. Tahun ini, Sekolah Menengah Yayasan menjadi tuan rumah bagi program pertukaran pelajar antara Sekolah Menengah Yayasan dan River Valley High School, Singapura.

Dalam Program Pertukaran Pelajar tersebut Sekolah Menengah Yayasan mengalukan kehadiran 10 orang pelajar dari River Valley High School, Singapura selama seminggu bermula pada 6 Rejab 1440 bersamaan 13 Mac 2019.

Program bermula dengan aktiviti penyerapan kebudayaan dan tradisi Brunei. Melalui program tersebut para pelajar dari River Valley High School berpeluang mengenali salah

satu alat muzik tradisi, iaitu Guling tangan; mempelajari tarian zapin serta mempelajari salah satu permainan tradisi Brunei, iaitu permainan Pasang.

Para pelajar dari River Valley High School juga dibawa melawat ke Taman Eco Ponies, Daerah Tutong. Para pelajar telah dapat menikmati alam semulajadi dan menyelami keindahan flora dan fauna di taman tersebut. Lawatan memberikan pendedahan kepada para pelajar terhadap kepentingan menjaga keharmonian alam sekitar. Para pelajar juga berpeluang mengenali juadah tradisi Brunei dan mempelajari cara pembuatan kuih tradisi 'Penyaram'.

Satu program khas disediakan bagi para pelajar dari River Valley High School iaitu program pendidikan alam sekitar. Melalui program tersebut mereka

dibawa membuat kajian pemuliharaan alam semulajadi dengan kerjasama pelajar dan pensyarah Universiti Brunei Darussalam. Program dikendalikan di Kuala Belalong, Temburong. Para pelajar telah menjalankan pelbagai eksperimen untuk menguji kualiti air dan faktor yang menentukan penyebaran invertebrata dalam sungai hujan tropika. Mereka juga membuat perbandingan ekologi antara habitat aliran sungai besar dengan aliran sungai kecil serta habitat di dalamnya.

Selain bagi menjalinkan hubungan kerjasama di antara kedua-dua buah sekolah dalam bidang pendidikan dan pembelajaran, program Pertukaran Pelajar tersebut juga memberi peluang para pelajar untuk mempelajari dan memahami warisan budaya, etika dan nilai budaya masyarakat tempatan bagi kedua-dua negara. ●





Persidangan Isu-isu Global Borneo Kali Ke-15

Empat orang pelajar telah dipilih untuk mewakili Sekolah Menengah Yayasan ke Persidangan Isu-isu Global Borneo (Borneo Global Issues Conferences - BGIC), kali ke-15. Persidangan diadakan selama tiga hari bermula pada 1 Rejab 1440 bersamaan 8 Mac 2019 di Sekolah Antarabangsa Brunei (ISB), Berakas.

Dengan tema '*Climate Action*', persidangan kali ini menghimpunkan lebih 300 penuntut dari beberapa buah sekolah di negara ini bagi membahaskan masalah-masalah serius global yang dihadapi mempunyai kaitan dengan Matlamat Pembangunan Mampan (*Sustainable Development Goals - SDG*), Pertubuhan Bangsa-Bangsa Bersatu (PBB).

Di samping membahas dan membincangkan pelbagai isu global, persidangan berkenaan adalah peluang untuk memupuk dan mengukuhkan persahabatan dalam kalangan para peserta.

Persidangan ini merupakan platform penting dimana pelajar-pelajar sebagai generasi penerus masa depan terlibat aktif membahas, membincang serta berkongsi pandang dalam mengupas matlamat SDG PBB yang berkaitan dengan '*Climate Action*' termasuklah isu-isu yang berkaitan dengan politik, sosioekonomi, hak-hak kemanusiaan dan alam sekitar.

Semasa sesi persidangan berlangsung, para pelajar telah berpeluang untuk menyertai demonstrasi yang menggambarkan mereka berada di dalam satu persidangan PBB selaku perwakilan dari pelbagai negara. Mereka juga berpeluang untuk mempelajari proses membahaskan resolusi untuk meringankan dan memecah kesulitan mengenai isu perubahan iklim yang serius. Para peserta juga telah berikrar untuk menentang penggunaan bahan-bahan yang diperbuat daripada plastik sebagai satu langkah bagi mengurangkan penggunaan plastik pakai buang. ●



Program Orientasi Pelajar Tahun 7



Sekolah Menengah Yayasan mengalukan seramai 88 orang pelajar baru Tahun 7 bagi tahun persekolahan 2019.

Hari pertama orientasi bagi pelajar-pelajar tersebut diadakan pada 28 Rabiulakhir 1440 bersamaan 5 Januari 2019 di Dewan Kuliah Sekolah Menengah.

Program orientasi dirasmikan oleh Dayang Chong Li Chen, Pemangku Ketua Pegawai Eksekutif Sekolah Yayasan yang juga selaku Pengetua Sekolah Menengah Yayasan. Dayang Chong Li Chen juga menyampaikan taklimat mengenai hal ehwal pentadbiran sekolah, akademik, kegiatan ko-kurikulum dan beberapa perkara yang berkaitan sekolah.

Pelbagai aktiviti telah disediakan dalam program orientasi tersebut. Antaranya ialah aktiviti '*team building*' bagi memupuk semangat berpasukan dan mendedahkan pelajar kepada sikap kepimpinan untuk melahirkan pelajar yang kreatif, inovatif, berdisiplin dan berani mengeluarkan idea. Jabatan Penerangan juga dijemput bagi menyampaikan taklimat kenegaraan. ●

Sambutan Hari Hindi Sedunia 2019



Sekolah Menengah Yayasan dengan kerjasama Suruhanjaya Tinggi India di Brunei Darussalam telah mengadakan Sambutan Hari Hindi Sedunia 2019 pada 23 Jamadilakhir bersamaan 28 Februari 2019. Sempena meraikan hari tersebut, Sekolah Menengah Yayasan telah

menganjurkan Pertandingan Bahasa Hindi kali ke-3 yang disertai oleh pelajar Tahun 7 hingga 10.

Seramai 24 orang pelajar dan tujuh orang guru menyertai pertandingan tersebut untuk bersaing dalam menyampaikan

puisi, nyanyian serta mengutarakan dialog daripada filem Bollywood. Seramai 16 orang finalis terpilih untuk menerima hadiah berupa wang tunai. Kesemua peserta juga diberikan sijil penyertaan dan buku.

Tuan Yang Terutama Ajaneesh Kumar, Pesuruhjaya Tinggi India ke Negara Brunei Darussalam hadir bagi menyaksikan pameran dan menyampaikan hadiah dan sijil.

Turut hadir ialah Awang Noorhaizamdin bin Haji Mohd. Mosbi, Ketua Pegawai Eksekutif Sekolah Yayasan, Pengiran Datin Paduka Hajah Hairani binti Pengiran Maharaja Lela Pengiran Muda Abdul Kahar, Ahli Kehormat Sekolah Yayasan Sultan Haji Hassanal Bolkiah dan Awang Haji Mohammad Sofi bin Orang Kaya Wijaya Haji Awang Abdullah, Timbalan Pengerusi Persatuan Ibu Bapa dan Guru-guru. ●

Kem Kitani Kali Ke-4



Jabatan Hal Ehwal Pelajar Sekolah Menengah Yayasan telah menganjurkan kem motivasi yang dikenali Kem Kitani iaitu dikhususkan bagi para pelajar Sekolah Menengah Yayasan. Untuk kali keempat kem ini diadakan, Sekolah Menengah Yayasan telah memilih tema '*Towards A Holistic Optimistic Self-Growth*'.

Kem tersebut diadakan selama tiga hari semasa cuti persekolahan penggal pertama bermula pada 16 Rejab 1440 bersamaan 23 Mac 2019. Kem Kitani kali keempat diadakan di Kem Latihan Program Khidmat Bakti Negara (PKBN), Kampung Batu Apoi, Daerah Temburong. Seramai 50 orang pelajar Tahun 7 hingga 11 telah menyertai Kem Kitani tersebut.

Kem Kitani bertujuan untuk menggalakkan percambahan ilmu dan idea serta mendidik peserta berfikiran kritis dan kreatif dalam menyelesaikan isu-isu yang dihadapi. Selain itu, program-program yang diterapkan dalam kem ini juga dihasratkan dapat menanamkan sikap bertanggungjawab, meningkatkan keyakinan diri, bekerjasama dan bertoleransi, amanah dan sikap bersungguh-sungguh menyelesaikan setiap tugas.

Aktiviti dan kegiatan yang diatur dalam kem tersebut dikendalikan oleh para jurulatih Kem Latihan PKBN, para sukarylawan Yayasan dan enam orang guru pengawas dari Sekolah Menengah Yayasan.

Pelbagai aktiviti dan kegiatan telah diaturkan selama mereka mengikuti kem berkenaan antaranya aktiviti kerohanian seperti ceramah ugama dan menunaikan solat fardu lima waktu berjemaah; kerja-kerja kemasyarakatan; kegiatan riadah seperti 'rock climbing', 'abseiling', 'jungle trekking' dan perlawanan tarik kalat. ●

Sukan Tahunan 2019



Sekolah Menengah Yayasan mengadakan acara Sukan Tahunan 2019 pada 2 Rejab 1440 bersamaan 9 Mac 2019 di Padang dan Balapan, Kompleks Sukan Negara Hassanal Bolkiah.

Hadir sebagai tetamu kehormat sekaligus merasmikan Sukan Tahunan 2019 ialah Awang Md. Noh bin Dato Paduka Haji Matasan, Timbalan Penggerusi Persatuan Ibu Bapa dan Guru-guru Sekolah Yayasan Sultan Haji Hassanal Bolkiah.

Acara tahunan tersebut antara lain bertujuan untuk meningkatkan kecerdasan fizikal dan mental pelajar, memupuk semangat persaingan yang sihat, meningkatkan semangat bekerjasama dan kerja berpasukan serta berganding bahu di dalam satu pasukan. Melalui acara ini, bakat dan kemahiran dalam bidang sukan dikalangan para pelajar dapat dicungkil dan dikembangkan.

Beberapa acara sukan dipertandingkan, antaranya ialah larian 100 meter, 200 meter, 400 meter dan 4 x 100 meter bagi kategori lelaki dan perempuan.

Juara keseluruhan Sukan Tahunan 2019 disandang oleh Rumah Temburong dengan kutipan pingat 13 Emas, 6 Perak dan 11 Gangsa, manakala Rumah Tutong pula telah menjuarai acara perbarisan lalu. ●

Majlis Konvokesyen dan Penyampaian Hadiah Terbaik Tahun 6



Sekolah Rendah Yayasan sekali lagi melakar pencapaian mengalakkkan dalam Peperiksaan Penilaian Sekolah Rendah (PSR) tahun 2019. Daripada seramai 132 orang murid yang menduduki peperiksaan PSR, seramai 57 orang murid (43.2%) mendapat pangkat 5A, 31 murid (23.5%) mendapat 4A dan 121 murid (91.7%) memperolehi 5 mata

pelajaran Gred A-C. Pencapaian dalam mata pelajaran Bahasa Inggeris, Sains dan Melayu Islam Beraja (MIB) juga melimpasi sasaran sekolah. Dengan pencapaian ini, status kedudukan Sekolah Rendah Yayasan adalah mengatasi prestasi pencapaian keseluruhan sekolah swasta dan nasional.

Dalam sejarah Sekolah Rendah Yayasan menduduki peperiksaan PSR selama 17 tahun (tahun pertama menduduki PR ialah 2002), pencapaian 100% telah dicapai sebanyak 10 kali.

Majlis Konvokesyen dan Penyampaian Hadiah Pelajar Terbaik bagi seramai 132 orang pelajar Tahun 6 (2018) telah diadakan pada 18 Rabiulawal 1440 bersamaan 26 November 2018 di Dewan Serba Guna Sekolah Yayasan Sultan Haji Hassanal Bolkiah. Hadir selaku tetamu kehormat dan seterusnya menyampaikan sijil dan hadiah ialah Dr. Dayang Nor Imtihan binti Haji Abdul Razak, Setiausaha Tetap di Kementerian Pembangunan, selaku Ahli Lembaga Pengarah Yayasan Sultan Haji Hassanal Bolkiah dan Ahli Lembaga Tadbir Sekolah Yayasan.

Dayang Hajah Mariam binti Haji Ladi, Pengetua Sekolah Rendah Yayasan dalam ucapan alu-aluan menyentuh mengenai kejayaan para pelajar bukan sahaja dalam bidang akademik malah dalam bidang kokurikulum. Beliau juga menyampaikan ucapan terima kasih kepada para ibu bapa yang telah memberi sokongan kepada sekolah dalam sama-sama mendidik anak-anak sehingga membawa kepada kejayaan.

Pelajar Terbaik Keseluruhan 2018 diterima oleh Dayang Aliya Aishah binti Sheikh Abdul Mahdani. Selain itu, guru-guru selaku tenaga pengajar murid Darjah 6 (tahun 2018) juga diberi pengiktirafan atas kegigihan mereka. ●





Pelajar Cemerlang Tahun 1-5 Diraikan

Seramai 108 pelajar cemerlang Tahun 1 hingga 5 Sekolah Rendah Yayasan diraikan pada Majlis Penyampaian Hadiah dan Sijil Pelajar Terbaik 2018 pada 20 Rabiulawal 1440 bersamaan 28 November 2018 di Dewan Serba Guna Sekolah Rendah Yayasan. Majlis ini merupakan pengiktirafan pihak sekolah bagi menyuntik semangat para pelajar untuk terus berusaha gigih dan meraih kecemerlangan dalam pembelajaran.

Hadir selaku tetamu kehormat untuk menyampaikan hadiah dan sijil dalam majlis tersebut ialah Dayang Marina Chek binti Bujang, Pegawai Tugas-Tugas Khas, Jabatan Sekolah-Sekolah merangkap Ketua Bahagian, Pendidikan Swasta di Kementerian Pendidikan.

Pengetua Sekolah Rendah Yayasan Sultan Haji Hassanal Bolkiah, Dayang Hajah Mariam binti Haji Ladi dalam ucapannya

berkata, kecemerlangan atau sesuatu kejayaan itu bukanlah mudah untuk dicapai atau dikecapai tanpa perjuangan dan pengorbanan. Pengiktirafan kejayaan para pelajar bukan sahaja dalam bidang akademik malah penglibatan mereka dalam bidang kokurikulum. Beliau menyampaikan ucapan terima kasih kepada para ibu bapa yang telah memberi sokongan kepada sekolah dalam sama-sama mendidik anak-anak sehingga membawa kepada kejayaan. Beliau juga menaruh kepercayaan kepada para guru-guru atas penat lelah mereka yang bertungkus lumus dan tidak jemu-jemu mendidik, memberikan dorongan, sokongan dan pengorbanan demi memikul amanah dan kejayaan pelajar-pelajar yang mereka didik.

Majlis diserikan lagi dengan pelbagai persembahan pentas termasuk demonstrasi pencak silat dan karate daripada pelajar Tahun 4 dan 5; persembahan lagu Mandarin bertajuk "Youzi Yin"; dan persembahan Mari Bercerita. ●



Sambutan Ulang Tahun Hari Kebangsaan Ke-35



Bagi menanam semangat patriotik dan cintakan tanah air, Sekolah Rendah Yayasan mengadakan Sambutan Ulang Tahun Hari Kebangsaan ke-35 pada 23 Jamadilakhir 1440 bersamaan 28 Februari 2019 di Dewan Serba Guna Sekolah Rendah Yayasan. Sambutan diraikan dengan pelbagai kegiatan.

Acara dimulakan dengan nyanyian Lagu Kebangsaan Allah Peliharakan Sultan diikuti dengan Lagu Sekolah dan Doa Hari Kebangsaan serta Doa Selamat.

Ucapan sempena Hari Kebangsaan disampaikan oleh Dayang Hajah Mariam binti Haji Ladi, Pengetua Sekolah Rendah

Yayasan Sultan Haji Hassanal Bolkiah yang mengingatkan warga sekolah mengenai makna kemerdekaan dan kesejahteraan yang dapat dinikmati oleh seluruh rakyat dan penduduk Negara Brunei Darussalam. Bagi mengukuhkan lagi rasa patriotisme warga sekolah, acara diteruskan dengan bacaan ikrar beramai-ramai yang diketuai oleh Eshraq 'Adnan bin Kharhan, Pelajar Tahun 6 Mars.

Pembentukan angka 35 oleh pelajar-pelajar Tahun 3 hingga 6 dibuat dengan penuh bersemangat. Kemuncak sambutan ialah persembahan daripada peserta SINERGI 35 yang menggabungkan pelajar-pelajar Tahun 4 dan diiringi dengan irama tradisional Melayu Brunei. ●



Program Kesedaran Keselamatan Jalan Raya



Kesedaran mengenai keselamatan jalan raya merupakan salah satu aspek penting yang perlu ditekankan kepada kalangan warga sekolah terutama para pelajar. Program Kesedaran Keselamatan Jalan Raya telah diadakan pada 23 Safar 1440 bersamaan 1 November 2018 di

Sekolah Rendah Yayasan Sultan Haji Hassanal Bolkiah dan disertai oleh para pelajar tahun 4 dan 5. Program tersebut dikendalikan oleh Megamas Training Company Sdn. Bhd sebagai tanggung jawab sosial korporat syarikat.

Objektif program adalah untuk meningkatkan kefahaman semua akan kepentingan keselamatan jalan raya sebagai pengguna, sama ada di dalam atau di luar sekolah. Penceramah undangan, Jeremy Chua dalam taklimatnya menyatakan mengenai tanggungjawab dan peraturan yang perlu dipatuhi oleh semua selaku pengguna jalan raya. Selain itu, kepentingan penggunaan tali pinggang keledar dan memandu mengikut had kelajuan juga diterangkan dalam taklimat tersebut. Had laju memandu di kawasan sekolah hanya 25km/j.

Para pelajar juga berpeluang untuk mengikuti Kuiz Kesedaran Keselamatan Jalan Raya bagi meningkatkan kefahaman mereka tentang program keselamatan ini. ●

Taklimat Mengenai 'Puberty and Hygiene'



Individu yang melalui transisi dari alam kanak-kanak ke peringkat usia Akil Baligh akan mengalami perkembangan fizikal dan psikologi yang tersendiri. Dalam usaha untuk memberikan kesedaran

kepada para pelajar untuk memahami pokara yang berkaitan dengan Akil Baligh (Puberty) dan Kebersihan (Hygiene), Jabatan Mata Pelajaran Sains Sekolah Rendah Yayasan telah mengadakan

taklimat mengenai Akil Baligh (Puberty) dan Kebersihan (Hygiene) pada 21 Jamadilakhir 1440 bersamaan 26 Februari 2019. Taklimat menyasarkan para pelajar Tahun 5 dan 6 iaitu mereka yang sedang meningkat remaja supaya mereka memahami tentang kebersihan diri dan tatacara menjaga kebersihan diri dengan betul sesuai dengan peringkat umur mereka.

Taklimat dikendalikan oleh para penceramah dari Pusat Promosi Kesihatan, Kementerian Kesihatan. Taklimat diadakan secara berasingan. Taklimat bagi pelajar lelaki ditempatkan di Dewan Sekolah Rendah Yayasan Sultan Haji Hassanal Bolkiah manakala bagi pelajar perempuan pula diadakan di Dewan Kuliah, Sekolah Menengah Yayasan Sultan Haji Hassanal Bolkiah. ●

Program Outreach OGDC

Seramai 132 pelajar Sekolah Rendah Yayasan telah mengikuti Program Outreach yang dianjurkan Pusat Penemuan Minyak dan Gas (OGDC) pada 5 Rabiulawal 1440 bersamaan 13 November 2018 di Dewan Sekolah Rendah Yayasan.

Program dihasratkan untuk memupuk minat dalam bidang sains dan teknologi, menggalakkan sains dan teknologi dalam kalangan pelajar dan menanamkan semangat kebanggaan terhadap bakat

diri sendiri, menyediakan pengalaman penerokaan, menggalakkan pemikiran kreatif dan mempromosikan kemahiran psikomotor dikalangan pelajar sekolah melalui model yang direka sendiri atau peralatan mudah.

Sepanjang program tersebut dilaksanakan, para pelajar telah dibahagikan kepada beberapa kumpulan dan mereka berpeluang untuk mencipta dan melancarkan roket air yang diperbuat daripada kotak kitar semula dan botol

air mineral. Pemenang pertandingan itu telah menerima hadiah daripada kakitangan OGDC.

Selain itu, para pelajar juga berpeluang untuk melihat beberapa pameran deria daripada pasukan OGDC seperti manipulatif bunyi. Pasukan OGDC juga membuat 'Pertunjukan Api' atau 'Eksperimen Tangan Api' dengan menggunakan air, cecair sabun pinggan mangkuk, gas butana dan pemetik api dapur. ●





Pelancaran Bulan 'Science and Art'

Pelancaran Bulan 'Science and Art' bagi Sekolah Rendah Yayasan telah disempurnakan oleh Dayang Hajah Mariam binti Haji Ladi, Pengetua Sekolah Rendah Yayasan Sultan Haji Hassanal Bolkiah pada 13 Jamadilakhir 1440 bersamaan 18 Februari 2019 di Dewan Sekolah Rendah Yayasan Sultan Haji

Hassanal Bolkiah. Bulan 'Science and Art' berlangsung selama sebulan.

Bulan 'Science and Art' disertai oleh kesemua pelajar dari tahun 1 hingga tahun 6. Program bertujuan bagi memperkayakan pengetahuan para pelajar dalam mata pelajaran Sains dan

Seni Lukisan. Program juga dihasratkan bagi memberi perangsang kepada para pelajar supaya menanamkan minat dalam mata pelajaran Sains dan Seni Lukisan bagi melahirkan pelajar yang inovatif dan kreatif.

Beberapa aktiviti diadakan sepanjang bulan 'Science and Art' yang membuka peluang para pelajar meneroka alam Sains dan Seni Lukisan di luar bilik darjah melalui pertandingan dan permainan. Melalui aktiviti tersebut para pelajar dapat melihat sendiri aplikasi sains dan seni lukisan dalam kehidupan harian dan melaksanakan pelbagai kegiatan yang berkaitan dengan mata pelajaran ini secara praktikal. ●





Penyampaian Sijil Akademik dan Konsert Taman Asuhan Kanak-Kanak

Majlis penyampaian sijil dan konsert sekolah bagi Taman Asuhan Kanak-Kanak Yayasan diadakan sebagai pengiktirafan kepada pencapaian kanak-kanak sepanjang tahun akademik. Bagi tahun akademik 2018, majlis tersebut diadakan secara berasingan bagi kanak-kanak Taman Asuhan 1, 2 dan 3. Majlis penyampaian sijil tersebut diikuti dengan konsert iaitu persembahan pentas yang menonjolkan daya kreatif dan kebolehan kanak-kanak.

Majlis Penyampaian Sijil Akademik dan Konsert Tahunan Taman Asuhan 1 diadakan pada 25 Safar 1440 bersamaan 3 November di Dewan Taman Asuhan Kanak-Kanak Yayasan. Seramai 165 orang kanak-kanak Taman Asuhan 1 diraikan di majlis ini. Hadir bagi menyampaikan sijil-sijil dan hadiah kepada kanak-kanak yang terpilih menerima Anugerah Pencapaian Terbaik (Best Achievement Award) dan Kemajuan Terbaik (Best Progress Award) ialah Cikgu Noorhaizamdin bin Haji

Mosbi, Ketua Pegawai Eksekutif, Sekolah Yayasan Sultan Haji Hassanal Bolkiah.

Kanak-kanak Taman Asuhan 1 juga membuat persembahan pentas yang bertema 'Fantasi TASKA'. Acara persembahan ini memberikan pendedahan bagi meningkatkan keyakinan diri kanak-kanak apabila berada di atas pentas dan di depan orang ramai.

Bagi kanak-kanak peringkat Taman Asuhan 2 dan 3 pula, Majlis Penyampaian Sijil Akademik dan Konsert Tahunan diadakan pada 16 Rabiulawal 1440 bersamaan 24 November 2018 di Dewan Taman Asuhan Kanak-Kanak Yayasan. Seramai 191 orang kanak-kanak Taman Asuhan 2 dan 202 orang kanak-kanak Taman Asuhan 3 diraikan di majlis tersebut. Majlis dibahagikan kepada dua sesi, iaitu sesi pagi bagi Taman Asuhan 2 dan sesi petang bagi Taman Asuhan 3.

Hadir bagi menyampaikan sijil dan hadiah kepada kanak-kanak Taman Asuhan 2 ialah Awang Haji Mustapha bin Haji Matahir, Penolong Pengarah Urusan, Yayasan Sultan Haji Hassanal Bolkiah. Manakala penyampaian sijil dan hadiah kepada kanak-kanak Taman Asuhan 3 pula disempurnakan oleh Dato Paduka Eddie bin Dato Paduka Haji Sunny, Pengarah Urusan Yayasan Sultan Haji Hassanal Bolkiah.

Kanak-kanak yang terpilih telah menerima anugerah pencapaian terbaik (Best Achievement Award) dan Kemajuan Terbaik (Best Progress Award) bagi menghargai usaha dan kecemerlangan serta pencapaian mereka di dalam kelas. Majlis dimeriahkan dengan persembahan pentas daripada murid-murid Taman Asuhan 2 yang bertemakan 'Nabi Muhammad, Idolaku' dan tema 'Ibu' pula dipersembahkan oleh murid-murid Taman Asuhan 3. ●

Meraikan Ulang Tahun Hari Kebangsaan Ke-35



Bagi menyuntik semangat patriotik dan cintakan negara kepada kanak-kanak, Taman Asuhan Kanak-kanak Yayasan telah mengadakan sambutan Ulang

Tahun Hari Kebangsaan Negara Brunei Darussalam Ke-35 pada 25 Jamadilakhir 1440 bersamaan 02 Mac 2019 di Dewan Taman Asuhan Kanak-Kanak Yayasan.

Majlis dimulakan dengan bacaan surah Al-Fatihah beramai-ramai dan diikuti dengan nyanyian Lagu Kebangsaan beramai-ramai dan nyanyian Lagu Sekolah. Tayangan video mengenai Perhimpunan Agung sempena Sambutan Ulang Tahun Hari Kebangsaan Ke-35 Negara Brunei Darussalam di Taman Haji Sir Muda Omar 'Ali Saifuddien telah memberikan pendedahan kepada kanak-kanak terhadap acara sambutan tersebut.

Acara sambutan diakhiri dengan perarakan di sekeliling kawasan luar bangunan Taman Asuhan Kanak-kanak dengan menyanyikan lagu-lagu patriotik. ●

Hari Orientasi Taman Asuhan 1



Bagi tahun akademik 2019, Taman Asuhan Kanak-kanak Yayasan Sultan Haji Hassanal Bolkiah menerima kemasukan seramai 175 orang kanak-kanak bagi kelas Taman Asuhan 1.

Kanak-kanak yang baru menjakkan kaki ke bangku sekolah dengan persekitaran yang baru setentunya akan menunjukkan pelbagai reaksi. Bagi menangani suasana ini, Taman Asuhan Kanak-kanak Yayasan telah mengadakan Hari Orientasi yang berlangsung selama

tiga hari berturut-turut bermula pada 1 Jamadilawal 1440 bersamaan 7 Januari 2019.

Orientasi bertujuan untuk mengenalkan kanak-kanak kepada guru-guru dan rakan-rakan yang akan bersama mereka di dalam kelas. Pelbagai aktiviti yang menyeronokkan disediakan bagi memberi pendedahan kepada kanak-kanak kepada persekitaran sekolah.

Program orientasi juga memberi peluang bagi ibu bapa mengetahui secara dekat persekitaran persekolahan serta pembelajaran anak-anak mereka, ekspektasi sekolah dan ibu bapa dan lain-lain aspek berhubung dengan pendidikan anak-anak. Para ibu bapa juga digalakkan sentiasa berhubung dengan sekolah bagi sama-sama membangun anak-anak daripada semua segi. ●

Lawatan TASKA ke Galeria Kesihatan

Dalam usaha untuk sentiasa memperkayakan pengalaman dan pembelajaran kanak-kanak, Taman Asuhan Kanak-Kanak Yayasan sering merancang kegiatan luar sekolah yang relevan dengan kurikulum TASKA. Antara kegiatan sepanjang tahun yang diungkayahkan ialah acara lawatan dan lain-lain kegiatan yang bersesuaian dengan peringkat umur kanak-kanak.

Seramai 196 orang murid Taman Asuhan 3, Taman Asuhan Kanak-kanak Yayasan telah mengikuti lawatan ke Galeria Kesihatan di Kementerian Kesihatan, Berakas. Kanak-kanak dibahagikan kepada tiga kumpulan untuk membuat lawatan secara berasingan bermula dari 22 Jamadilawal 1440 bersamaan 28 Januari 2019.

Lawatan bertujuan untuk memberikan pengetahuan asas kepada kanak-kanak dan guru-guru mengenai aspek kesihatan termasuk cara-cara mencegah penyakit berjangkit. Mereka melihat dan mendengar sendiri penerangan dari pakar di samping memberi pengalaman baru yang berkaitan dengan kurikulum yang mereka pelajari di dalam kelas. ●





Muzakarah Guru bersama Ibu Bapa dan Penjaga

Taman Asuhan Kanak-kanak Yayasan telah mengadakan Muzakarah Guru bersama Ibu Bapa dan Penjaga pada 7 Rejab 1440 bersamaan 14 Mac 2019 bertempat di Dewan Taman Asuhan Kanak-kanak.

Dalam sesi muzakarah tersebut, ibu bapa dan penjaga diberi peluang untuk berjumpa dengan guru kelas anak masing-masing untuk mengetahui hal ehwal pembelajaran anak mereka di dalam kelas.

Muzakarah bertujuan mengeratkan kerjasama di antara para ibu bapa, penjaga dan guru dalam mengenalpasti perkembangan prestasi anak-anak dan keperluan bagi sebarang pemberian. ●



VISI

Masyarakat Mandiri

MISI

Menguruskan Amal Jariah
Kebawah Duli Yang Maha Mulia
Paduka Seri Baginda Sultan Haji Hassanal Bolkiah
Mu'izzaddin Waddaulah
dan Ahli-Ahli Keluarga Baginda
secara profesional, cekap dan
penuh dedikasi.

Wadah diterbitkan oleh
Yayasan Sultan Haji Hassanal Bolkiah
Jalan Perdana Menteri
Bandar Seri Begawan BA1511
Negara Brunei Darussalam

Telefon
223 4085 | 223 4087 | 223 4088
Faksimili
223 4082

Laman Web
www.yshhb.org.bn
Instagram
yshhb_official

Facebook
Yayasan Sultan Haji Hassanal Bolkiah